

96-боб. Қулларни сўкиш



16:22 / 14.09.2020 2346

Маърур ибн Сувайддан ривоят қилинади:

«Абу Зарр Ғифорийни кўрдим, ўзи ҳам, қули ҳам бир хил либос кийиб олишибди.

Абу Заррдан бу ҳақда сўрадик. У шундай деди:

«Мен бир одам билан сўкишиб қолдим. У одам Набий соллаллоҳу алайҳи васалламга менинг устимдан шикоят қилди. Шунда Набий соллаллоҳу алайҳи васаллам менга:

«Сен уни онаси билан айбладингми?» дедилар.

«Ҳа», дедим. Шунда у зот:

«Албатта, қулларингиз биродарларингиздир. Аллоҳ уларни қўл остингизда қилиб қўйган. Кимнинг биродари қўл остида бўлса, унга еганидан едирсин, кийганидан кийдирсин. Уларга кучи етмайдиган нарсани юкламанг, бордию юкласангиз, уларга ўзингиз ёрдам беринг», дедилар».

Шарҳ: Расулуллоҳ соллаллоҳу алайҳи васаллам қулларни «биродарларингиз» деб эълон қилдилар ва шунга яраша муносабатда бўлишга чакирдилар. Ҳатто оғир ишга буюрмасликни, агар буюрилса, унга ёрдамлашиб юборишни таъкидладилар.

Абу Зарр Ғифорий розияллоҳу анҳу бир қулларини сўкканлари учун Расууллоҳ соллаллоҳу алайҳи васаллам Ислом умматига ана шундай буюк ва шарафли насиҳатлар қилдилар.

Ушбу ҳадисдан олинадиган фойдалар:

1. Абу Зарр Ғифорий розияллоҳу анҳунинг Расууллоҳ соллаллоҳу алайҳи васалламнинг ҳадисларига оғишмай амал қиласиган зот эканлари.
2. Бирорнинг қилаётган ишини тушуна олмаса, ўзидан сўраш жоизлиги.
3. Бирор билан сўкишиш жоиз эмаслиги.
4. Раҳбарга ўзи билан сўкишган киши ҳақида арз қилиш мумкинлиги.
5. Ходимлар хўжайинларнинг биродарлари экани.
6. Хўжайнин ўзи еган нарсадан ходимига ҳам едириши кераклиги.
7. Хўжайнин ўзи кийган нарсадан ходимига ҳам кийдириши кераклиги.
8. Хўжайнин ходимига оғир келадиган ишни буюрмаслиги кераклиги.
9. Хўжайнин ходимига оғир иш буюрса, унга ўзи ёрдам бериши кераклиги.

«Одоллар ҳазинаси» китобидан